



საქართველოს მთავრობის გ ა ნ კ ა რ ბ უ ლ ე ბ ა

N 748 2022 წლის 26 აპრილი ქ.თბილისი

სსიპ – საქართველოს მუნიციპალური განვითარების ფონდის მიერ
განსახორციელებელი ღონისძიებების შესახებ

1. საქართველოს ორგანული კანონის „ადგილობრივი თვითმმართველობის კოდექსის“ 159-ე მუხლისა და „საჯარო სამართლის იურიდიული პირის – საქართველოს მუნიციპალური განვითარების ფონდის დაფუძნების, სამეთვალყურეო საბჭოს განსაზღვრისა და მისი დებულების დამტკიცების შესახებ“ საქართველოს მთავრობის 2015 წლის 30 ოქტომბრის №558 დადგენილებით დამტკიცებული დებულების მე-3 მუხლის პირველი პუნქტის „ა“ ქვეპუნქტის საფუძველზე, სსიპ – საქართველოს მუნიციპალური განვითარების ფონდმა (შემდგომში – ფონდი) უზრუნველყოს:

ა) ფეხბურთში უეფას 21 წლამდელთა 2023 წლის ახალგაზრდული ჩემპიონატის ფინალური ტურნირის ჩასატარებლად საჭირო სტადიონების მშენებლობა-რეაბილიტაციისათვის საჭირო საქონლის, საპროექტო-სახარჯთაღრიცხვო დოკუმენტაციის მოსამზადებლად მომსახურებისა და

შესაბამისი სამშენებლო სამუშაოების (შემდგომში – სპორტული ინფრასტრუქტურის განვითარების პროგრამა) შესყიდვა;

ბ) „სახელმწიფო შესყიდვების შესახებ“ საქართველოს კანონის 10¹ მუხლის 3¹ პუნქტის შესაბამისად, სახელმწიფოებრივი და საზოგადოებრივი მნიშვნელობის ღონისძიების შეზღუდულ ვადებში შეუფერხებლად ჩატარების მიზნით, ამ განკარგულების პირველი პუნქტის „ა“ ქვეპუნქტით გათვალისწინებული ღონისძიებების ფარგლებში საქონლის, მომსახურებისა და სამუშაოს სახელმწიფო შესყიდვა, ამავე კანონის 15¹ მუხლის მე-3 პუნქტის „ა“ და „გ“ ქვეპუნქტებით განსაზღვრულ ვადებში.

2. ამ განკარგულების პირველი პუნქტის „ა“ ქვეპუნქტით გათვალისწინებული საქონლის, მომსახურებისა და სამუშაოს შესყიდვები, საჭიროებისამებრ, შესაძლებელია განხორციელდეს:

ა) ერთიანი შესყიდვის ფარგლებში (ე. წ. design-build); ან/და

ბ) პრეისკურანტის საფუძველზე.

3. „სახელმწიფო შესყიდვების შესახებ“ საქართველოს კანონის პირველი მუხლის მე-4 პუნქტის თანახმად, მიეცეს თანხმობა ფონდს, ამ განკარგულების პირველი პუნქტის „ა“ ქვეპუნქტით გათვალისწინებული ღონისძიებების ფარგლებში შესყიდვების განხორციელებისას, საჭიროების შემთხვევაში, გამოიყენოს მსოფლიო ბანკის მიერ განსაზღვრული შესყიდვების პროცედურები (მათ შორის, შოპინგი, პირდაპირი მოლაპარაკებები და სხვა პროცედურები).

4. დაევალოს სსიპ – სახელმწიფო შესყიდვების სააგენტოს, ამ განკარგულების პირველი პუნქტის „ა“ ქვეპუნქტით გათვალისწინებული ღონისძიებების ეფექტიანად განხორციელების მიზნით, ფონდის მიმართვის საფუძველზე, გადახედოს იმ სამუშაოსა და მომსახურების CPV კოდებს, რომელთა შესყიდვა შესაძლებელია პრეისკურანტის საფუძველზე.

5. დაევალოს სსიპ – სახელმწიფო შესყიდვების სააგენტოს, ამ განკარგულების პირველი პუნქტის „ა“ ქვეპუნქტით გათვალისწინებული ღონისძიებების ეფექტიანად განხორციელების მიზნით, ფონდის მიმართვის საფუძველზე, განახორციელოს სპორტული ინფრასტრუქტურის

განვითარების პროგრამის ფარგლებში საქონლის, აღჭურვილობისა და ინვენტარის კონსოლიდირებული შესყიდვა.

6. დაევალოს საქართველოს ფინანსთა სამინისტროს:

ა) უზრუნველყოს ამ განკარგულების პირველი პუნქტის „ა“ ქვეპუნქტით გათვალისწინებული ღონისძიებების დაფინანსების მიზნით 100 მილიონი ლარის მოძიება, მათ შორის, 70 მილიონი ლარის – 2022 წელს, ხოლო 30 მილიონი ლარის – 2023 წელს;

ბ) ამ პუნქტის „ა“ ქვეპუნქტით გათვალისწინებული, 2022 წელს საჭირო თანხის ნაწილობრივ დასაფინანსებლად, საქართველოს სამინისტროების მიერ ტენდერების განხორციელების შედეგად მიმდინარე წელს წარმოქმნილი ეკონომიების მიმართვის მიზნით, წარმოადგინოს შესაბამისი წინადადებები.

7. ამ განკარგულების პირველი პუნქტის „ა“ ქვეპუნქტში მოცემული დაფინანსების გამოყოფამდე, ფონდმა უზრუნველყოს ამ განკარგულების პირველი პუნქტის „ა“ ქვეპუნქტით გათვალისწინებული 2022 წელს განსახორციელებელი ღონისძიებების დაფინანსება „საქართველოს 2022 წლის სახელმწიფო ბიუჯეტის შესახებ“ საქართველოს კანონის საფუძველზე, ფონდისათვის დამტკიცებული „საქართველოს მუნიციპალური განვითარების ფონდის მიერ განსახორციელებელი პროექტების“ ქვეპროგრამით (პროგრამული კოდი: 25 03 01) განსაზღვრული ასიგნებებიდან.

8. დაევალოს საქართველოს ფინანსთა სამინისტროს, საქართველოს რეგიონული განვითარებისა და ინფრასტრუქტურის სამინისტროს მოთხოვნის საფუძველზე, 2023 წლის საქართველოს სახელმწიფო ბიუჯეტის პროექტის მომზადების დროს, გაითვალისწინოს ამ განკარგულების პირველი პუნქტის „ა“ ქვეპუნქტით გათვალისწინებული 2023 წელს განსახორციელებელი ღონისძიებების დაფინანსებისათვის საჭირო დამატებითი თანხები.

9. დაევალოს საქართველოს კულტურის, სპორტისა და ახალგაზრდობის სამინისტროს, ა(ა)იპ – საქართველოს ფეხბურთის

ფედერაციასთან კოორდინაციით, არა უგვიანეს 2022 წლის 28 აპრილისა მოამზადოს და ფონდს მიაწოდოს ამ განკარგულების პირველი პუნქტის „ა“ ქვეპუნქტით გათვალისწინებული სტადიონების სია.

10. ეთხოვოს ა(ა)იპ – საქართველოს ფეხბურთის ფედერაციას, საქართველოს კულტურის, სპორტისა და ახალგაზრდობის სამინისტროსთან შეთანხმებითა და კოორდინაციით, არა უგვიანეს 2022 წლის 28 აპრილისა, მოამზადოს და ფონდს მიაწოდოს ამ განკარგულების პირველი პუნქტის „ა“ ქვეპუნქტით გათვალისწინებული თითოეული სამშენებლო ობიექტის მიხედვით შემდეგი დოკუმენტაცია:

- ა) ტექნიკური დავალება;
- ბ) შესასრულებელი სამშენებლო/სარეაბილიტაციო სამუშაოების პრეისკურანტი;
- გ) შესასრულებელი სამუშაოების სავარაუდო მოცულობა;
- დ) სამუშაოთა მოცულობიდან გამომდინარე, სავარაუდო სამშენებლო გეგმა-გრაფიკი;
- ე) გამოსაყენებელი მასალებისა და აღჭურვილობის დეტალური სპეციფიკაციები და რაოდენობა (მოედნის საფარი, ლედგანათება, გარე განათება, ტაბლო, სკამები (ტიპების მიხედვით), გახმოვანებისა და აუდიო სისტემა, სარეკლამო ლედგანათება, სახანძრო სისტემა და ა. შ.);
- ვ) ინფორმაცია სამშენებლო/სარეაბილიტაციო სტადიონების მიწის ნაკვეთების რეგისტრაციის/გადმოცემის პროცედურების მიმდინარეობის შესახებ.

11. სპორტული ინფრასტრუქტურის განვითარების პროგრამის ფარგლებში, ეთხოვოთ შესაბამის სამინისტროებსა და მუნიციპალიტეტებს, უზრუნველყონ საქართველოს კანონმდებლობით გათვალისწინებული დაჩქარებული პროცედურების გამოყენება, ობიექტების ეტაპობრივი სანებართვო და ექსპლოატაციაში მიღების წესების შესაბამისად.

12. საჭიროების შემთხვევაში, დაევალოს სსიპ – ლევან სამხარაულის სახელობის სასამართლო ექსპერტიზის ეროვნულ ბიუროს, ამ განკარგულების პირველი პუნქტის „ა“ ქვეპუნქტით გათვალისწინებული

ღონისძიებების ეფექტიანად განხორციელების მიზნით, ფონდის მიმართვის საფუძველზე, ტექნიკური ზედამხედველობა და შესაბამისი ექსპერტიზის ჩატარება.

13. ფონდმა ამ განკარგულების პირველი პუნქტის „ა“ ქვეპუნქტით გათვალისწინებული სამუშაოების მიღება განახორციელოს შესაბამისი მუნიციპალიტეტის მერიის/აჭარის ავტონომიური რესპუბლიკის მთავრობის შესაბამისი ორგანოს მონაწილეობით და სამუშაოები, მათი დასრულების შემდგომ, გადაეცეს შესაბამის მუნიციპალიტეტის მერიას/აჭარის ავტონომიურ რესპუბლიკას.

14. ეთხოვოს შესაბამის მუნიციპალიტეტს/აჭარის ავტონომიურ რესპუბლიკას, ამ განკარგულების მე-13 პუნქტის გათვალისწინებით, სამუშაოების მიღების პროცესში მონაწილეობა და სამუშაოების დასრულების შემდგომ მიღება.

პრემიერ-მინისტრი

ირაკლი ღარიბაშვილი

